



**JUDICIAL SYSTEM MONITORING PROGRAMME  
PROGRAMA MONITORIZASAUN SISTEMA JUDICIAL**

***Komunikadu Imprensa***

***14 Marsu 2013***

**Tribunál Distritál Dili kontinua julga kazu violénsia doméstika**

Iha 12 Marsu 2013 Tribunál Distritál Dili prezide julgamentu ba kazu violénsia doméstika ne'ebé akontese iha Aldeia Anin Fuik Kampu Alor.

Ministériu Públiku akuza katak iha 16 Outubru 2011, arguidu ho inisial AE ho liman sikun fai iha lezada ZM nia kabun dala ida, lori ulun fai iha lezada nia hirus matan dala rua ho kapasete baku iha ulun dala tolu no kauza lezada monu kedas iha fatin.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fizika simples konjuga ho artigu 35 Lei Kontra Violénsia Doméstika.

*“Mesmu Ministériu Públiku akuza arguidu ho ofensa ba integridade fízika simples, maibé krime ne'e realiza ho maneira no alvu ne'ebé fo amiassa sériu ba saúde lezada nian, tanba ne'e JSMP hein katak tribunál bele konsidera faktu sira ne'e antes halo desizaun ida ne'ebé apropiadu ba kazu ne'e,”* dehan Diretor ezekutivu JSMP Luis de Oliveira Sampaio.

Iha julgamentu arguidu konfesa total faktus no han-malu ho depoimentu lezada nian. Arguidu no lezada deklara liu tan kona-ba sira-nia relasaun atual katak hela hamutuk hanesan fen ho la'en maibé laiha komunikasaun di'ak no sempre iha dezintendimentu tanba nesesidade iha familia laran. Aktualmente, maske sira iha taxi rua atu sustenta sira nia moris, maibé arguidu ignora responsabilidade ba lezada.

Ministériu Públiku husu ba tribunál atu arguidu tenke prevene nia hahalok ne'e hasoru lezada. Iha kazu ida ne'e Ministériu Públiku husu ba tribunál fó pena ida ne'ebé mak justu.

Defeza argumenta katak arguidu konfesa totalmente tanba ne'e husu ba tribunál fó pena konkreta fulan 6 prizaun no suspende ba tinan 2.

Kazu ne'e rejista iha tribunál ho Númeru Prosesu: 628/2012/TDD. Julgamentu prezide husi juis Dr. Jose Maria, Ministériu Públiku representa husi Dr. Hipolito Santa no arguidu hetan defeza husi Dr. Cancio Xavier husi Eskritóriu Defensória Públiku. Ofisiál Justisa ne'ebé responsavel iha prosesu mak Sr. Julio Ribeiro.

Julgamentu leitura sentensa iha 21 Marsu 2013 tuku 15:30 loraik.

Atu hetan informasaun kle'an favor kontaktu direktamente:

Luis de Oliveira Sampaio  
Diretor Ezekutivu JSMP  
Diresaun e-mail: [luis@jsmp.minihub.org](mailto:luis@jsmp.minihub.org)  
Landline: 3323883 / 77810637  
[www.jsmp.tl](http://www.jsmp.tl)